


Háteigur



18. árgangur 4. tbl.

VIRÐING – SAMVINNA – VELLÍÐAN

30. apríl 2014

Vorhátíð 10. maí

<http://hateigsskoli.is>

Frá skólastjóra

Ágætu lesendur

Sumarið er komið og blóm og tré eru að taka við sér um alla borg. Vorið og sumarið er ætíð kærkomið með hita sínum, vorleikjum og vorboðum. Vorhátíðin er einn af vorboðunum og er skipulag hennar langt á veg komið. Gott samstarf er á milli skólans og foreldrafélagsins um hátíðina. Þetta er í 19. sinn sem hátíðin er haldin og er það fagnaðarefni fyrir skólann að eiga þetta góða samstarf með foreldrafélaginu því að vorhátíðin er svolítið eins og þjóðhátíð skólans með skrudgöngu, pylsusölu og margvíslegum uppákomum – oftast nær í blíðskapar vorveðri. Ég hvet alla nær og fjær til að fjölmenna og njóta hátíðarinnar. Upplýsingar um dagskrá og skipulag fá allir í tæka tíð. Við ættum ef til vill að reyna að gera okkur sérstakan dagamun á vorhátíð næsta vor í tilefni af 20 ára afmælinu.

Annar vorboði er svo barnamenningarhátíðin sem nú er að festast í sessi í Reykjavík og hvet ég foreldra til þátttöku með börnum sínum í öllu því sem boðið er upp á. Hægt er að finna upplýsingar á vefnum: <http://barnamenningarhatid.is/>

Ég get ekki látið hjá líða að geta þess að á laugardaginn var fengum við í heimsókn til okkar stóran hóp nemenda sem útskrifaðist vorið 1994. Það er okkur mikils virði að eiga stund með fyrrum nemendum sem eiga ljúfar minningar frá skólagöngu sinni og segja frá skólanum og starfinu. Það er mikilvægt hverjum skóla að eiga að þá fjölmörgu sem útskrifast hafa í gegnum tíðna. Fyrrum nemendur bjóða fram krafta sína til að styðja við skólastarfið og dæmi eru um að þeir leiti ráða eða komi í kurteisheimsóknir. Skólinn hefur einnig verið þakklátur fyrir þær gjafir bæði stórar og smáar sem skólanum hafa borist í gegnum tíðina. Það má því segja að gamlir útskriftarnemendur séu einnig orðnir eins konar vor- og sumarboðar. Það eykur okkur styrk og er hvetjandi í amstri daganna að finna fyrir hlýhug þeirra sem muna okkur enn á fullorðinsárum.

Gleðilegt sumar,

Ásgeir Beinteinsson, skólastjóri Háteigsskóla

Vorhátíð 10. maí

Árleg vorhátíð Háteigsskóla verður 10. maí og hefst hún kl. 12:00.

Byrjað verður á skrudgöngu þar sem lúðrasveit verður í fararbroddi. Þar er búið að úthluta eftirfarandi skrudgöngulitum á árganga: 1. bekkur gulur, 2. bekkur rauður, 3. bekkur grænn, 4. bekkur blár, 5. bekkur svartur, 6. bekkur hvítur, 7. bekkur fjólublár, 8. bekkur brúnn, 9. bekkur bleikur og 10. bekkur appelsínugulur.

Boðið verður upp á margskonar skemmtun og einnig verða sýnd verkefni nemenda frá vetrinum. Tvenns konar hoppukastalar verða í boði, fyrir minni og stærri börn, einnig flóamarkaður, pylsusala, útileikir, andlitsmálning, kaffihús, danssýning, stuttmyndir, leiksýning og margt fleira.

Verðandi nemendur skólans eru sérstaklega boðnir velkomnir.

Skjaldbaka

Þetta er skjaldbaka og það voru páskar. Hún var að leita að páskaegginu sínu en hún fann það ekki. Hún fattaði ekki að það var ofan á henni. Svo fór hún að sofa og eggjó datt í bólið og hún fann það. Hún sagði húrei, húrei!



Róbert Arjona Ingólfsson, 2. bekk

Vinir

Einu sinni voru vinir sem hétu Halli, Palli, Kalli og Snorri. Þeir áttu heima á Akureyri en voru í Reykjavík hjá afa hans Kalla. Þeir spiluðu lengi lengi. Svo heyrðu þeir í rísa og fóru inn í helli hans og þeir urðu bestu vinir.

Karl Orri Brekason, 3. bekk

Bæklingar um málþroska og lesskilning

Sameiginleg ábyrgð er yfirskrift fjögurra bæklinga um málþroska og lesskilning barna sem gefnir hafa verið út. Í þeim eru einfaldar leiðbeiningar fyrir foreldra um hvernig megi örva mál- og lesskilning barna frá fæðingu og til 12 ára aldurs. Bæklingarnir eru í rafrænu formi á [Foreldravefnum](http://www.reykjavik.is/foreldrar), <http://www.reykjavik.is/foreldrar>.

Býfluga og könguló

Einu sinni var býfluga sem lifði góðu lífi sem átti heima í góðum garði en svo kom könguló í garðinn. Hún var rosa leið út af því að köngulóin var svo fljót að spinna vef og einn daginn var vefurinn tilbúinn. En svo festist hún í vefnum og hún barðist um en köngulóin kom nær og nær. Og svo kom strákur sem tók eitt blómið. Það var gott fyrir hana og köngulóin festist sjálf í vefnum.

Ulfur Ægir Halldórsson, 2. bekk

One direction

One direction syngur vel,
en nota stundum mikið gel.
Þeir taka stundum aukalög,
en kunna ýmis önnur fög.

Elín Katla Henrysdóttir, 5. bekk

Stærðfræðikeppni.

Menntaskólinn í Reykjavík hélt sína árlegu Stærðfræðikeppni grunnskólanna þriðjudaginn 4. mars sl.

Frá Háteigsskóla mættu 23 til leiks úr 8., 9. og 10. bekk. Aldrei hafa fleiri skólar tekið þátt í keppninni en þeir voru 18 og aldrei hafa fleiri keppendur mætt til keppni en þeir voru á fjórða hundrað. Keppnin fór vel fram og er kennurum skólans og nemendum 6. bekkjar í MR til mikils sóma.

Verðlaunaathöfn var haldin í MR 30. mars og þá fengu efstu tíu í hverjum árgangi viðurkenningarskjal og í verðlaun vandaða reiknivél frá CASIO.

Hallgrímur Kjartansson úr 10. SA lenti í tíunda sæti í sínum árgangi í hörku keppni og Emil Fjóluson Thoroddsen úr 8. AMJ sigraði með glæsibrag í sínum árgangi og hlaut auk viðurkenningar og reiknivélar 25 þúsund krónur í verðlaun.

Ég vil óska öllum keppendum Háteigsskóla til hamingju með að hafa tekið þátt í keppninni. Helgi Baldursson



Ljóðið um fiskinn hér fyrir ofan er eftir Isabellu Maríu Eriksdóttur í 7. bekk.

Ljóðabók í 9. HB

Hér koma fleiri ljóð úr Ljóðabók 9. HB:

Einn og yfirgefinn

Einn og yfirgefinn
á frostkaldri grund.
Horfi á himingeiminn
og fæ ég mér blund.

Á meðan sólin skín
og fuglarnir kvaka
hugsa ég til þín.
Mig langar svo að vaka.

En þegar nóttin kemur
og ljósið fer,
frostið mig lemur
en samt bið ég þín hér.
Lilja og Þórdís

Greinin sem fór að heiman

Greinin bjó með móður sinni og föður í gömlu en fallegu tré. Einn dag datt hún niður úr trénu í grýttan jarðveg. Hún leit upp í örvæntingu og vissi innst inni að hún næði aldrei á toppinn aftur. Hún grét sig í svefn á hverju kvöldi. Steinarnir spurðu hana hví hún væri að gráta. Greinin svaraði þá: „Því þið eruð svo harðir og kaldir.“

Karen Ivanovic

Spóinn

Spóinn situr á staurnum beinn
er sumrinu lýkur að vanda.
Bráðum hann leiður verður einn
en vinirnir flögra til annarra landa.
Júnía Lín Jónsdóttir

Prjónagraff á Barnamenningarhátíð

Nemendur í Háteigsskóla verða með prjónagraff á Barnamenningarhátíð laugardaginn 3. maí frá klukkan 12-16. Þeir hafa prjónað og heklað búta og renninga sem saumaðir verða á hluti í umhverfinu. Hópurinn Prjón og hönnun í 9. bekk ber ábyrgð á verkinu undir stjórn Ragnheiðar Valgerðar kennara. Allir nemendur skólans eru hjartanlega velkomnir að taka þátt.

Ljósmyndir og ljóð

Í Borgarbókasafninu við Tryggvagötu hefur verið sýning á ljósmyndum og ljóðum eftir grunnskólanemendum í Reykjavík og þar á meðal nær öllum nemendum 7. bekkjar Háteigsskóla. Þetta er afrakstur námskeiðs sem Marteinn Sigurgeirsson hélt með þeim, þar sem nemendur tóku ljósmyndir og ortu síðan við þær ljóð. Vonandi verður fljótlega hægt að skoða öll þessi flottu ljóð með myndum á heimasíðunni okkar.

Gíraffinn sem mátti aldrei vera með

Einu sinni var gíraffi sem mátti aldrei vera með hinum gíróffunum af því að hann leit út eins og geimvera. Hann gat aldrei sofið. Einn daginn tók hann til sinna ráða og fór út í geim. Þegar hann var búinn að venjast því að vera á tunglinu leið honum strax betur. Róbert Winther Ísaksson, 3. bekk

☞ Spakmæli mánaðarins: ☜

Lífið er fullt af unaðslegri tónlist.

Maður þarf bara að hafa hægt um sig og hlusta.